

SIPA nastavila akciju sprečavanja šverca duhana

U nastavku akcije kodnog naziva List, policijski službenici Državne agencije za istrage i zaštitu (SIPA) u nedjelju su pretresli dva objekta na području općine Grude. Aktivnosti su izvedene u saradnji sa pripadnicima Uprave za indirektno oporezivanje BiH.

Pretreseni su objekti koje koriste osobe inicijala R. B. i Z. B. s ciljem pronalaska i privremenog oduzimanja predmeta koji mogu poslužiti kao dokaz u daljem postupku. Tokom pretresa pronađena je i privremeno oduzeta jedna mašina za sječenje duhana, oko 170 kilograma sječenog duhana i drugi predmeti.

Osobe inicijala R. B. i Z. B. sumnjiče se da su počinile krivično djelo organizirani kriminal, u vezi s krivičnim djelom porezna utaja ili prevara. Oni se sumnjiče da su kao članovi organizirane kriminalne grupe tokom 2015. više puta na tržište Republike Hrvatske prokrijumčarili veće količine sječenog duhana i nezakonito ubacili u ilegalan promet. R. B. i Z. B. pozvani su u službene prostorije SIPA i saslušani u svojstvu osumnjičenih. Tokom rada na ovom predmetu ostvarena je bliska saradnja sa policijskim organima Hrvatske, sapsćeno je iz SIPA.

U okviru akcije List, koja je započeta 13. jula, SIPA je lišila slobode više osoba koje se dovode u vezu sa krijumčarenjem visokotarifnih roba u BiH, odnosno nezakonitim prometom duhana u listu i sječenog duhana, te pretresla objekte na 31 lokaciji na širem području BiH.

